



# DEO OPTIMO MAX. UNI ET TRINO.

VIRGINI DEIPARÆ, ET S. LUCÆ  
Orthodoxorum Medicorum Patrono.

## QUÆSTIO MEDICA.

QUOD LIBET ARIIS DISPUTATIONIBUS  
manè discutienda, in Scholis Medicorum, die Jovis octavâ  
Januarii M. DCC. XXXIX.

M. JOANNE-JACOBO BELLETESTE,  
Doctore Medico, Præsidente.

*An dura Menynx habeat motum à se?*

### I.



ORPUS humanum divini Opificis sapientiam mirificè extollit, sed humani ingenii deprimit superbiam. Illius Mechanismus adeo obscurus est & intricatus, ut eum penitus deprehendi, nulla spes nobis affulgeat. Fluidorum singulorum demensum, crasim, figuram, secretionem, saporem, colorem, velocitatem, diversos diversis in locis virium in solida gradus, solidorum quorumque fabricam, compagem, *organisations*, elaterem, nutritionem, incrementa pernoscere, summopere arduum. In hoc opere capeffendo, quibusdam constantia, quibusdam defuit requisita mentis sagacitas. At in cudendis systematis fingendi licentia nunquam à vero magis abfuit, quàm in iis quæ de durâ Menynge excogitata hâc ætate circumferuntur: nempe dura mater motum systalticum à se habere perhibetur. Ea quidem vis oscillandi in durâ Menynge pluribus

A

2

arridet, ut ingeniosè inventa, & nonnullis phænomenis explanandis idonea. Placeat sanè decipi amantibus, non placebit utique iis, qui non tam ingenii deliciis, quàm ipsâ veritate delectantur. Si quis duræ matris structuram, situm, usumque diligenter expendat, ipsam per se moveri haud posse faciliè intelliget.

I I.

**I**NTER membranas primas sibi vindicat dura mater, nec immeritò: quippè ob nobilitatem visceris quod ambit, præ aliis conspicua. Multis fibrarum ordinibus confutur, maximè in parte concavâ spectandis. Hinc inde diversimodè positi atque invicem intertexti, illi apparent secundùm sinum longitudinalem, sinuque laterales, atque illud septum quo cerebellum tegitur, semper numerosiores. Duabus lamellis constat dura mater, quarum externa durior atque asperior, interna magis lavis, mollis ac lubrica est, utpote quæ mucosâ lymphâ mader. Variis in locis varias duplicaturas efformat. Earum prima septum est longitudinale quod propter figuram falx nuncupatur: hæc à cristâ galli originem ducens, ad posteriora progrediendo sensim fit latior, atque ad corpus usque callosum immerfa, cerebri substantiam in duas partes dividit; altera septum audit transversum, quod inter cerebrum & cerebellum interjacens, formam cameræ exhibet. Tertia duplicaturarum minima, olivæ occipitalis spinæ validè affixa, inter cerebelli posteriores lobos illabitur. Dura Meninx insuper duas productiones præ aliis observandas efficit, primam quidem, per fissuram sphenoidis in orbitam transeundo ut eam integram vestiat; alteram, per foramen occipitale ad extremum vertebrarum canalem descendendo, ut spinæ medullam obducatur. Egressâ quoquè è cranio cum nervis, per totum corpus iis vaginas sufficit. Vasa cujuscumque generis sortita est, innumeras quidem arterias, quarum aliæ carotidis internæ, aliæ carotidis externæ, quædam vertebraliū propages sunt: diffunduntur illæ per totam ejus substantiam, atque in infinitos prope modum ramos divise, eam sic ubique cooperiunt, ut primo aspectu ex arteriis conflata, crederetur. Venas duplicis generis nacta est, quasdam venis reliqui corporis similes, quasdam verò prorsus absimiles, amplissimas, formâ triangulari præditas: hi canales in memoratis sepris cernuntur, sinus vocantur ab anatomicis, atque ad xij circiter recensentur. Non caret nervis dura mater; ei quippe filamenta aliquot à quinto pari, nonnulla etiam à ramo retrogrado portiois duræ nervi auditorii suppeditantur. An glanulas habeat valde ambiguum: cernuntur quidem quædam granula, juxta longitudinalem sinum passim congregata, verum ea glomos esse fibrarum alteratarum multi suspicantur. Sic se quidem habet decantata illa membrana, quam à se motum habere quidam affirmant, plurimi verò firmis rationum momentis innixi pernegant.

I I I.

**V**IDEAS, quæso, quanta cerebri moles quibusdam duræ matris partibus incumbat; quot & quanta vasa sanguinem invehentia & revehentia, per ejus substantiam permeent; deinde verò fibras ejus cum pondere & impetu corporum incumbentium conferas. Dices sanè ipsis duntaxat suppetere quod satis est, ut tantum onus sustineant, motuique alieno illas se resistent. Id verum esse indicat earum dispositio; ubi requiritur minor renixus, ibi minus numerosæ & compactæ, ubi renixus major requiritur, ibi numerosiores & compactiores existunt; quod juxta sinum longitudinalem septumque cerebelli maximè pater: si verò motum systolicum haberent, nonne æqualis ubique earum textura cerneretur, cum æqualiter oscillare eas oporteret? At demus ipsas oscillare posse; nonne à causâ externâ impellente vim illam eas mutuari putabis? Profecto duræ matris fibræ non sunt magis ad motum comparatæ, quàm fibræ cordis & arteriarum. Attramen fibræ illæ, ut debitos motus exercent, alieno indigent auxilio: istud auxilium sufficiunt, purpureus la-

3  
tex, succusque nerveus. Sola fluida ad motum impertiendum & conservandum destinata, sola, à primo conceptionis momento, motum obtinere, solidis communicandum. Fibrae ergo quaecumque motrices, ob peculiare robur ipsi innatum, ut tunc à flu dis statim motæ sunt, ita deinceps à fluidis moveri pergunt. An verò si fibræ validissimæ per se moveri nequeant, fibræ duræ Menyngis debiliores per se moverentur? quo jure, quâ virtute occultâ, id solæ obtinerent ad quod natæ non sunt? Sed eam nullo prorsus motu donari, ejus situs ususque demonstrant.

I V.

QUÆ natura mobilia voluit, ea sic locavit, ut libera ac expedita forent; quæ verò voluit immobilia, ea variis retinaculis constrinxit. Cave igitur alicui parti mobilitatem aut immobilitatem assignas, nisi verum ejus situm, juxta anatomiae leges, expendaris. Si duræ matris situs diligenter examinatus fuisset, non ita vigeret temerè concepta de illius oscillationibus opinio. Duram Menyngeam in futuris duntaxat suspendi, alibi verò liberam, olim creditum est. Tantum errorem clarissimorum anatomicorum observationes, variis in cadaveribus repetitæ, abegerunt. Cerebrum integrum perpendiculari sectione in duas partes divide, duram matrem undequaque cranio adhærescentem intueberis; hæc in futuris, in sinuum vestigiis imprimisque in basi ita validè agglutinata est, ut non nisi ægrè avelli queat. Qui tandem, amabo, sic arctè contracta alternis vicibus sese attollere ac deprimere possit? ut id exequeretur, aut cranium deprimeretur pariter, aut duræ matris retinacula lacerarentur, necesse esset. Dicas potiùs eam sic contractam esse ut stet semper inconcussa. Id probant etiam non vana argumenta ab ejus usibus petita; nimirum per plurima vasa, ac præcipuè sanguinea cranii parti concavæ adhæret, atque adeò periostei interni vicem ipsi præbet, Nonne eam sic decet esse immobilem, instar membranarum aliarum quæ cæteris passim osibus adhærescunt? præterea majora vasa quæ in cranium ingrediuntur, suâ superficie fulcit, septa varia, variosque sinus efformat, ut anatomia docet, opportunas cerebro sedes constituit aspera lubricans, impedit quominus cerebrum aliquot succussibus lædatur, ac ipsi demum, quod pericardium cordi, idem officium præstat, Non ne ad talia munia ritè obeunda, eam residem ac quietam esse necessitas ipsa postulat? an verò si ipsa esset instabilis, tot partes stabilire posset, imò potiùs ejus importunis motibus omnia pessundarentur, vasa huc illuc fusque deque impulsâ brevi fatiscerent, septa distracta corruerent, sinus deficerent labantes, ipsa cerebri substantia crebris ictibus sustinendis impar, consideret. Tot incommoda metuens natura sagax, duram matrem ita validis frænavit vinculis, ut vel minimùm sese commovere frustra niteretur.

V.

CORRUERET ne igitur tam amœnum oscillationum duræ matris systema? Corruat sanè. At, inquires, Istud systema quod jam profligatum autumas, a doctissimis viris propugnatur. An eorum auctoritatem aspernaberis? Non ne cum iis fateberis, in durâ Menynge, aperto cranio, systolen ac diastolen manifestam apparere, ipsam si pungatur statim convelli, ac proindè motibus peragendis idoneam? Non ne fateberis etiam, aliquam potentiam requiri, quæ succi nervei secretionem promoveat, eumque deorsum propellar, ut cor propellat sanguinem? Ista autem potentia, quænam alia esse potest ac dura Menynx? Doctrinæ dos est eximia, sed multorum errorum aliquando mater; dum doctrinæ tantum tribuitur, natura ipsa negligitur. Ne pudeat doctissimos viros animantium cerebrum inspicere, scrutentur duram matrem, omisso tantisper præjudicatis opinionibus, eam innumeris arteriarum myriadibus decorari aspicient; non igitur mirum si in eâ systole ac diastole appareat, licet undique contracta sit. Isti motus solis arte-

riis per duram & piam matrem distributis debentur, sustinet quidem arterias mil-  
cantes, sed ipsa manet immota. Nec mirum quoque videri debet, si ipsa pun-  
ctâ, convulsiones oboriantur: istæ punctiões, tùm ejus nervos, tùm alios etiam  
quibus arctissimè connectitur, irritant; nervis irritatis, convulsivos motus con-  
sequi necesse est. Jam ut succi nervei promoveantur secretio ac propulsio, nulla  
alia quàm cordis & arteriarum potentia requiritur.

*Non ergo dura Menynx habet motum à se.*

# DOMINI DOCTORES DISPUTATURI.

<i>M. Henricus-Francisus Bourde- lin.</i>	<i>M. Robertus-Hubertus Linget.</i>	<i>M. Guillelmus de Magny.</i>
<i>M. Antonius-Joannes Daval.</i>	<i>M. Achilles Francisus Fontaine.</i>	<i>M. Gabriel-Antonius Jacques.</i>
<i>M. Otto-Casimirus Barsknecht.</i>	<i>M. Joannes-Baptista-Ludovicus Chomet.</i>	<i>M. Germanus Preaux Antiquior Scholæ Magister, &amp; Regius Professor Emeritus.</i>

Proponebat Parisiis JOAN. LUDOVICUS BAUDE DELA CLOY,  
Audomareus, Baccalaureus Medicus, A. R. S. H., 1739, à sextâ  
ad meridiem.